

18/02/1998

Sepakat pulih ekonomi (HL)

KUALA LUMPUR, Selasa - Malaysia dan Singapura bersetuju bekerjasama dengan rakan Asean lain untuk mengembalikan kestabilan mata wang serantau.

Pernyataan bersama yang dikeluarkan oleh Wisma Putra pada hari terakhir lawatan kerja dua hari Perdana Menteri Singapura, Goh Chok Tong ke sini, menyebut pegawai kedua-dua negara akan mengkaji cadangan menggunakan mata wang serantau dan pilihan lain dalam membiayai perdagangan di kalangan negara Asean.

Cadangan untuk menggunakan mata wang sendiri berikutan kejatuhan nilai mata wang negara Asean berbanding dolar Amerika dan kelembapan ekonomi, dikemukakan pada Sidang Kemuncak Tidak Rasmi Asean Kedua di sini, tahun lalu.

"Kedua-dua kerajaan akan menumpukan usaha untuk bekerjasama dalam bidang perbankan dan kewangan," kata pernyataan itu.

Menurut pernyataan itu, kedua-dua Perdana Menteri juga mengakui, ekoran krisis kewangan serantau, adalah penting kedua-dua negara bekerjasama dalam semua bidang yang mungkin.

Datuk Seri Dr Mahathir Mohamad dan Goh bertemu semalam bagi perbincangan yang bertumpu pada krisis mata wang sekarang serta isu dua hala lain.

Asean membincangkan secara mendalam untuk meningkatkan perdagangan di kalangan mereka menggunakan mata wang masing-masing ekoran kejatuhan nilai mata wang negara rantau ini berbanding dolar Amerika.

Selepas menemui rakan sejawatannya dari Thailand, Chuan Leekpai di Bangkok baru-baru ini, Dr Mahathir berkata Malaysia, Thailand dan Indonesia bersetuju mengkaji penubuhan rumah penjelasan bagi memudahkan penggunaan mata wang Asean dalam perdagangan di kalangan mereka.

Dalam pernyataan itu juga, Singapura menyatakan keyakinannya terhadap prospek ekonomi Malaysia dan akan menggalakkan sektor swastanya melabur di Malaysia serta sebaliknya.

"Dalam hal ini, kedua-dua Perdana Menteri menekankan pentingnya kedua-dua pihak saling memegang ekuiti dalam infrastruktur dan sektor ekonomi lain yang dapat meningkatkan kemakmuran bersama dan menjamin masa depan ekonomi," katanya.

Kedua-dua kerajaan juga menyambut baik penubuhan Majlis Perniagaan Malaysia-Singapura oleh sektor swasta untuk meningkatkan perdagangan dan pelaburan antara kedua-dua negara.

(END)